

青神縣志卷五十四

外紀志

文廟碑陰有詩云

宣聖宮牆欲鼎新故於林下覓閒人
櫺星門耐禁風雨筆架山當
作主賓無數化龍池底物應期華

國席間珍品題輪奐非無謂贏得詩篇紀翠珉

予四鄉耆宿黎應芳許連程永道龔朝祖當其在官率有能
聲既而以老職歸隱有年成化丙午冬予始謀重修學宮事
以董工得人難之僉舉四君以充果致調度有方公勤不怠
早收成功足垂永久詩以獎譽如醫生何琛出納甚謹不傷
財不病民亦所取云

成化二十三年五月初一日邑人余子俊書

重修鴻化堰開堰祭山川賦

以祈保民安物阜
爲韻

顏 謹

錦水灘頭青衣峽口三江澄練遙接湔灌岷泉萬斛流清折
入瞿塘淵藪田有上下之分利遍東南之畝厥壤初開功高
安邑禹王離堆再鑿澤沛華陽大守惟其地號膏腴是以年
書大有水德固曰靈長蜀都由來殷阜乃青邑之有鴻化堰
也堤堆沙岸水吸江濱波濤壅淤石砌湮淪先年初始宏規

僅存古蹟厥後重修偉業拋廢荒闡豈無溝洫沃野千疇難
待西江之水亦非石田青城萬戶竟等瘠土之民縣令顏謹
北闕承恩西川育物保障每切夫閭閻憂勤不忘乎黼黻導自眉
壤得綠水之溶溶截向周河傍青山之屹屹想黃河之堵未
敢依稀憶金湖之堤差云髣髴亦念人力勝天誰云棄井難
掘爾其崖穿石壁波挽狂瀾荷鋤滾滾運甓團團溝量淺深
數里之桃源頓闢地隨凹凸兩面之竹篔齊攢凡夫堰頭堰
埂堰湃堰渠作不因乎唐制止水蓄水蕩水均水法仍效乎
周官自是習坎而孚覺翻車之已細盈科後進笑桔槔之徒

青神縣志

卷五十四外紀

三十九

難觀萬畝之涵濡輟耕誰嘆幸三時之永賴樂利同安茲當
勾芒布令太皞揚暉陽回淑氣暖破寒威卮泛漫漿欣逢杜
若洲邊水漲盤供兼味適值桃花浪裡魚肥望砥柱之中流
川增願同山壽覩汪洋於四野秋實必先春祈我

皇上念切痾瘵情殷懷保四海九州之遙皆資利濟高原下隰之
區無憂早澇况當時序既調又復大功再造竚見潑潑洋洋
湯湯灑灑眴涂溝澮歡飲犢之牧童軌里連鄉有流杯之野
老宜卜萬年之休嘉願上無疆之頌禱

考觀風文

縣令 解學詩

蜀郡才藪也青邑舊邦也山川形勝原稱秀麗焉靈巖標石
笋之竒寶鏡照寒潭之潔古閣引清風爽氣仙池邀夜月凝
光蓉花映彩於春濤麟趾呈祥於瑞井加以三峯翠疊牧童
牛背卧吹簫虎渡舟橫江水旋迴迎過客地云靈矣人其傑
乎夷考當年陳少卿才幹剛直杜臺諫骨梗清標揚學士望
隆海內余戶部義篤友朋至若王員外品行端方後學永爲
模範余少保政績茂著三邊總制西陲前代既有偉人於今
豈無碩彥茲者風和日煦陽春烟景恬人鳥語花香大塊文
章假我興歌蘭浦淨掃琴堂凡我生童勿予遐棄緬圭璋之

特達曷勝心儀瞻錦繡之多儀頓開茅塞毋勦說毋雷同宜
出心裁爲貴或長篇或短幅各成體制爲佳說甚麼玉律金
科無過局醇詞正看那些陸離光怪何嘗氣足神完務盡一
日之長以驗三餘之學如其古勁蕭疎應入島瘦郊寒之派
若乃波瀾濶壯自具韓潮蘇海之觀勿謂風塵下吏誰與論
文須知空谷足音自逢賞識爾眉果白余眼終青情深益友
兼三期定仲春朔五幸伊人之宛在悉惠然其肯來中心藏
之竚目望之